

Augsburg, 22. Mai 1563

An Joachim Camerarius d. Ä.

BSB, Clm 10370, Nr. 285.

Clarissimo viro, D. Ioachimo Camerario etc. Domino et amico suo colendo. Leipzig.
 S. P. D. Mense Aprili bis, nisi fallor, ad te scipsi, et cessationem scribendi meam, si non defendi, excusaui tamen vtcunque, imò praeclarè, apud te praesertim, κριτὴν εὐγνωμονέστατον ὅντα. Egi etiam de D. Laurentio Tuppio Pomerano, an ei locus aliquis in reflorescente feliciter academia vestra docendi iurisprudentiam esse possit? Eas literas te accepisse puto, et quò minus responderis (Nam D. Tuppij causa moram aegrè patitur) per absentiam tuam esse factum. Quòd autem nunc ad te scribo: iussu magistratus nostri scholastici facio, qui, me quidem ex parte autore, fama instauratae vestrae scholae permotus, suos stipendiarios apud vos propter et disciplinam seueriorem, et moderationem disputationum maiorem, erudiri vellet, modò ne caritas annonae obstaret. Anno superiore vix impetraui, vt quadrageni f. miseris decernerentur, cum antè, tricenos tantum haberent. Sed ne sic quidem, vt audimus, victitare istic poterunt, nisi liberalitate publici collegij fruantur. Quae commoditas, si eis non negata fuerit, sine dubitatione quam primum vnum atque alterum et pòst fortasse plures mittemus. Qua de re Clariss[ime] vir, ne graueris me facere certiorem, idqüe quam primum, etiam atque etiam oro. Noster ἀλάριχος tandem custodia liberatus, ἀλλὰ κατὰ τὸ τοῦ μηδίου, οἰσθα δήπον ὅ, τι λέγω, plurimum saluere te iubet. Pestis apud nos paulatim serpere fertur, non sine metu, ne vnà cum aestu ingrauescat. Nobis igitur

Orandum est vt sit mens sana in corpore sano,
 et, quod longè praestat

Orandum est, felix sit vt emigratio nostra.
 Ego tibi et tuis omnia secundissima precor. Vale. Augustae Vindelicorum 22 Maij 1563.

Hiero[nymus] Wolfius.